

Namminersorlutik Oqartussat Umiarsualivinnut Immikkoortunut pilersaarutaat 2017-2027-imoortoq tunngavigalugu umiarsualiviit aserfallatsaalineqarnerinut, ineriartorteqqinnerinut ingutserneqarnerinullu pingaarnersiunermit pilersaarummik, qanorlu siunissami aserfallaatsaaliinnermut aningaasartuutissanik kinguaatsoorfiunnginnissaanut periarfissanik imaqartumik Naalakkersuisut suliaqaqqullugit peqquneqarnissaannik Inatsisartut aalajangiiffigisassaattut siunnersuut.

(Inatsisartuni Ilaasortaq Harald Bianco, Inuit Ataqtigiit)

pillugu

Sanaartornermut Ataatsimiititaliap

Siunnersuutip aappassaaneerneqarneranut

ISUMALIUTISSIISUTAA

Sanaartornermut Ataatsimiititaliap suliarinninnermini ukuninnga inuttaqarpoq:

Inatsisartunut ilaasortaq Kristian Jeremiassen, Inuit Ataqtigiit, Siulittaasoq
Inatsisartunut ilaasortaq Siverth K. Heilmann, Atassut, siulittaasup tullia
Inatsisartunut ilaasortaq Harald Bianco, Inuit Ataqtigiit
Inatsisartunut ilaasortaq Anders Olsen, Siumut
Inatsisartunut ilaasortaq Jens Kristian Therkelsen, Siumut

UKA 2022-imi ulloq 26. oktober siullermeerinninnerup kingorna ataatsimiititaliap siunnersuut misissorpaa.

1. Siunnersuutip imarisaa siunertaalu

Umiarsualiviit siunissami atorneqarsinnaanissaat qulakkeerniarlugu nutarsarneqarnerinut, ineriartortinneqarnerinut ingutserneqarnerinullu Naalakkersuisut pingaarnersiullutik pilersaarusiornissaat qulakkeerneqarnissaat siunnersuummi siunertarineqarpoq.

2. Siunnersuutip Inatsisartunit siullermeerneqarnera

Umiarsualivinnut immikkoortunut pilersaarutit nutarterneqarnissaat tamatumanilu qanoq ililluni Kalaallit Nunaanni aserfallatsaaliinissamut kinguaattoorutit pinngitsoortinneqarnissaat aamma isiginiarneqassasoq siunnersuutip siullermeerlugu suliarineqarnerani ataatsimut isigalugu taparserneqarpoq.

Naalakkersuisunit allannguutissatut siunnersuut tuulliuttoq saqqummiunneqarpoq:

”Naalakkersuisut Umiarsualivinnut Pilersaarummut nangitsiviusumik, immikkoortumut pilersaarummi tullerriiarinerni killiffimmik saqqummiussiviusumik suliaqaqqullugit peqquneqarnissaannut Inatsisartut aalajangiiffigisassattut siunnersuut.”

Allannguutissatut siunnersuut ataatsimut isigalugu akuersaartumik isummerfigineqarpoq.

3. Ataatsimiititaliap siunnersuummik suliarinninnera

Ataatsimiititaliap sulinermini Naalakkersuisut nalunaarusiaat marluk tulliuuttut misissorpaat:

- Namminersorlutik Oqartussat Umiarsualivinnut Immikkoortunut pilersaarutaat 2017-2027-imoortoq
- Ineqarnermut, Attaveqaasersuutitut Naligiissitaanissamullu Naalakkersuisoqarfik – Kalaallit Nunaanni umiarsualivinni aserfallatsaaliuinermini kinguaattoorutit pillugit 2021-mi nalunaarusiaat.

Tamatumunnga atatillugu Sanaartornermut Ataatsimiititaliamit ulloq 26. marts 2022-mi Isumaliutissiissutaa, UPA2022/166, innersuussutigineqassaaq tassunga Naalakkersuisunit allannguutissatut siunnersuut tulliuuttoq saqqummiunneqarpoq:

”Talittarfinnik aserfallatsaaliinissami kinguaattoorutit pillugit nalunaarusiap nutarterneqarneranut atatillugu, ulittarneranut tinittarneranullu tunngatillugu talittarfiit qarsunneqartaleriartuinnarneri isumannaannerusumik aaqqissuunneqarnissaat Naalakkersuisunit ukkatarineqarnissaa pillugu, Inatsisartut aalajangiiffigisassaattut siunnersuut”

Ataatsimiititaliami	amerlanerussuteqartunit	allannguutissatut	siunnersuutip
akuersissutigineqarnissaa	inassutigineqarpoq.	Allannguutissatut	siunnersuut
aappassaaneerneqarnerani	Naalakkersuisunit	saqqummiunneqartoq	Inatsisartunit
akuersissutigineqarpoq.			

Naalakkersuisut allannguutissatut siunnersuutaat akuersissutigineqassappat, suliniuteqarnermi UPA2022/166-mut allannguutissatut siunnersuutip Immikkoortunut Pilersaarutitut

ilanngunneqarnissaa ataatsimiititaliamit pingaartinneqarpoq. Tamanna pingaartumik talittarfiit immap ulittarneranit tinittarneranillu qarsunneqartaleriartuinnarnerisa isumannaannerusumik aaqqissuunneqartariaqarnerisa pisariaqarneranut pingaaruteqarpoq.

Aserfallatsaaliinissamik kinguaattoorutit annikillisarneqarnissaannik suliniartoqarnissaa Inatsisartuni ilaasortani ataatsimut isigalugu annertuumik taperseerineqarnera Ataatsimiititaliamit maluginiarneqarpoq.

Naalakkersuisut Inatsisartunut ataatsimiititaliamullu Umiarsualivinnut Immikkoortunut pilersaarutaasa ingerlaqqinneri pillugit ilisimatitsissutigineqartarnissaat tamanna tunngavigalugu ataatsimiititaliamit kissaatigineqarpoq.

4. Siunnersuutip aningaasatigut kingunerisassai

Inatsisartut suleriaasianni § 33, imm. 1-imi allassimavoq aalajangiiffigisassatut siunnersuutip piviusunngortinnerani aningaasaqarnikkut allaffissornikkullu kingunerisassat siunnersuutip tunngavilersuutaani aallaaserineqassat.

Tassunga naapertuuttumik siunnersuummi siunnersuutip aningaasatigut kingunerisassai allaaserineqartut AC-tullu suliaqartup ukiumut akissarsiassaatut naleqassasoq naatsorsuutigineqartoq ataatsimiititaliamit maluginiarneqarpoq.

Naalakkersuisut allannguutissatut siunnersuuteqarnerminnut atatillugu aningaasatigut kingunerisinnaasaanik allaaserisaqarsimangillat. Aningaasatigut kingunissai allannguutissatut siunnersuutip kingunerisaanik immikkut ittumik aningaasaliisoqarnissaa pisariaqanngitsoq Ataatsimiititaliaq isumaqarpoq.


5. Ataatsimiititaliap inassutai

Ataatsimiititaliap isumaqatiittup Naalakkersuisut allannguutissatut siunnersuutaata akuerineqarnissaa inassutigaa.

Taamatut oqaaseqarluni isumaliutissiisummillu allassimasutut paasinnilluni matumuuna ataatsimiititaliap siunnersuut aappasaaniigassanngortippaa.




Kristian Jeremiassen
Siulittaasoq




Siverth K. Heilmann
Siulittaasup tullia



Harald Bianco



Anders Olsen



Jens Kristian Therkelsen